

Lider di MEP Evelyn Wever- Croes:

Deal di La Dolce Vita ta mescos cu e klasnan modular

"Ainda nos no sa si a tuma e mehor decision!"

ORANJESTAD (AAN) — DIARIO a acerca e lider di MEP, Parlamentario Evelyn Wever- Croes, como cu ta fraccion di MEP a pidi e reunion publico tocante cumplimiento di edificio di antes "La Dolce Vita", cual proceso MEP ta cuestiona.

Segun señora Wever- Croes for di dia 4 di November fraccion di MEP a pidi e reunion aki, pasobra nan ta hayando informacion relaciona cu e deal di compra di e lugar menciona, y despues cu nan a acumula informacion, cual tambe nan a comparti cu prensa, nan a pidi e reunion.

El a bisa cu nan a pidi tur documento relevante y nan a haya hopi pero no tur, y e tema aki fraccion di MEP a trece dilanti tambe durante e bijeenkomst. Utilities a priminti di duna nan esaki, pero ainda na comienzo di e reunion nan no a haya nan.

Un documento importante cu nan no a haya ta e contrato di compra entre Utilities y SIG, cu ta esun cu a bende e propiedad.

Parlamentario Wever-Croes a subraya cu esaki ta importante, pasobra MEP tin entendido cu den e prijs di 1.350.000 Florin tin un parti cu Utilities a dicidi di paga extra, pa paga belastingnan di e doño anterior, y esaki ta inusual.

El a bisa cu si un hende ta compra algo cu no tin balor sentimental e ta paga e prijs di mercado, y esaki ta 900.000 Florin, manera su fraccion a worde informa for di Belasting.

Wever- Croes a bisa cu entre mas pregunta nan ta haci nan ta keda cu mas duda, y ademá otro aspecto ta e opcionnan cu tabata tin y cu Utilities a explora prome cu adkiri e propiedad en cuestion.

Fraccion di MEP kier sa si e decision aki ta financieramente responsable. Gobierno a splica e fraccion di MEP cu tin un caso den Corte y nan no kier stroba e proceso, y segun señora Wever- Croes

su fraccion tin comprension p'esey y pa tal motibo a sigui cu e reunion, aunke ta falta algun documento.

E dama a relata cu gobierno a splica cu nan tin hopi pura, cu tabata tin urgencia pasobra nan kier a ubica TNO eynan cu ta un lugar bisto y cu hopi exposicion, y cu e mester a habri pareu cu e "green conference" cu tabata tumando lugar.

Segun e Parlamentario esaki ta algo noble y bunita cu e por tin comprension pe, pero no mester sigui haci cos pura y keda sin aplica e reglanan cu mester aplica, pero a yega tempo pa planifica sin cu tin

nodi di kibra regla.

El a compara esaki cu e caso di e klasnan modular cu e minister a bisa cu pasobra tin urgencia e proyecto no por a bay den destaho publico y esey a haci cu e asunto a caba den Parlamento y ainda nan no sa si e deal di 16 mil ta mehor of no. E caso di La Dolce Vita ta mescos, unda cu pa falta di informacion MEP no por evalua y huzga si enberdad ta e mehor decision gobierno a tuma.

E lider di fraccion di MEP a bisa cu e mes a haci hopi pregunta durante e bijeenkomst y menos cu mitad a worde contesta, y no tabata tin man-



era pa e expertonan contesta nan, y no a keda na otro cu yama e reunion publico.

El a subraya cu nan no a haya loke nan tabata tin mester di dje pa convence nan mes cu no tin nada iregular.

Y riba e preguntanan cu nan a haya contesta, tabata tin hopi contradiccion. Señora

Wever- Croes a bisa como ehemplo, cu nan kier sa si Utilities a asegura su mes cu e balor di e propiedad tabata bal e prijs cu nan a paga pe. E contesta ta cu un experto a bisa nan cu si. Fraccion di MEP a pidi pa laga nan wak esey, pero te ainda nan no a haya esaki tampoco. E Notario a bisa cu e si a mira un rapport di taxacion di 2010, mientras cu Utilities y e Minister ta bisa cu no tin rapport di taxacion di 2010. Y asina, segun señora Wever- Croes tin hopi contradiccion y e ta spera cu na final di e reunion publico lo por haya un mehor bista riba e asunto aki.